

四庫全書

集部

欽定四庫全書

集部

遜志齋集卷二十四

詳校官編修臣曹城

中書臣劉源溥覆勘

覆校官中書臣朱鈐

校對官助教臣汪錫魁

謄錄監生臣吳炳文

欽定四庫全書

遜志齋集卷二十四

明 方孝孺 撰

古詩

蜀王殿下賜行厨酒膳奉謝

天門傳詔飛金符，帝子發春朝。帝都萬里巴，江引軸轡。  
朝離瞿塘，莫荆巫牙旗。羽扇照江湖，馮夷操楫龍伯扶。  
威振海若驚天吳，衮衣登朝玉陛趨。至尊撫問情鬱紆，  
奏還大國天語俞。却從周秦行坦途，乘傳西來試馳驅。

日行三百尚未晡親藩留宴窮歡娛秦民擁路觀金輿  
口稱盛德目睚眦共說賢王世所無南入荆門喜氣蘇  
蜀邦密邇忘崎嶇山花爛熳雲模糊綠樹清江如畫圖  
漢中小臣章句儒早向王門曾曳裾是日來迎拜路隅  
按轡遙看咲且呼暮抵行宮侍直爐華燈照夜鋪瓊瑜  
從容前席講典謨玄談蟬聯如貫珠上探千古周八區  
鄙諂榮辱聖爲徒更闌喜極行玉壺叩頭舉白紅生膚  
侍臣奉教恩意殊大官美醞貯行厨特賜歸飲不用沽

上尊珍味甘且腴受之無功辭有辜心感王恩厚矣乎  
獻諸祖禰頌妻孥招致朋僚洗罍觚共飲相歡同賜醕  
平生飲水兼茹蔬祗將鉛槧代耕鋤近爲校教食民租  
尸居靜閱年歲徂世人視之等泥途賴逢聖主意氣孚  
討論聖猷師古初經綸萬理髮在梳小臣學術本麤疎  
志廣年荒才更迂量同溟海肯納汙欲致衆駿先收駑  
願王道德爲世模摩撫疲瘞恤鰥孤南漸瀘戎北羗胡  
陽和發生無朽枯育民興賢語不誣行致孔明與夷吾

共康國政秉事樞保釐西土佐唐虞不數蠶叢及魚鳧  
吾王端拱化日舒從此感恩非一夫

歌風臺

歌風臺下春水黃歌風臺上春草碧黃河之水日夜流  
碧草年年自春色漢祖當時爲帝王龍泉三尺飛秋霜  
五年馬上得天下富貴樂在歸故鄉臺前老人爭拜跪  
拄杖麻衣見天子龍顏自喜還自傷一半隨龍半隨鬼  
翻思昔日亭長時一心捧檄日夜馳即今宇宙過四海

一榻之外誰撐持却令猛士鎮寰宇安得長年在鄉里  
可憐創業垂統君後使乾機付諸呂淮陰少年韓將軍  
金戈鐵馬立戰勲藏弓烹狗太逼迫解衣推食何殷勤  
致令英雄遭婦手血濺紅裙當斬首蕭何下獄子房歸  
左右功臣皆掣肘還鄉悲唱大風歌向來老將今無多  
咸陽宮闕親眼見不忍荊棘埋銅駝臺前老人淚如雨  
爲言不獨漢高祖古來世事無不然稍稍功成忘險阻  
荒祠古廟名歌臺前人已盡今人哀感激悲歌下臺去

斷碑春雨生莓苔

潼關

潼關將軍才且武五千士卒健於虎朝廷養汝爲阿誰  
盜賊公行如不覩昨日官車將到關西風放顛塵滿天  
錢囊衣篋繫車後歛來掣去同鷹鷂南望京師五千里  
僮僕所資餘有幾離家漸遠親故稀向我長號淚如雨  
嗟嗟僮僕汝莫愁聖人在上治九州會看海內皆富足  
關不須防無盜偷



淮陰

淮陰城頭落日黃  
淮陰城下秋草荒  
古城西繞淮水長  
猶如背水陣堂堂  
當時大將功無雙  
顛羸蹴項勇莫當  
丈夫何乃爲假王  
至今遺恨令人傷  
漂母一飯千金償  
解衣推食那敢忘  
相君之背貴莫量  
蒯生此語無忠良  
慎弗出口遭吾撞  
歌風帝子歸故鄉  
思得勇士守四方  
胡爲烏盡良弓藏

題嚴子陵

敬賢當遠色治國須齊家如何廢郭后寵此陰麗華糟糠之妻尚如此貧賤之交奚足倚羊裘老子早見機獨向桐江釣煙水

赤壁

東夏口西武昌赤壁峭絕當中央奸雄將軍氣蓋世敗卒零落慚周郎得鱸魚沽美酒孰若黃州蘇子瞻謫向江湖動星斗噫吁戲曹公氣勢蘇子文章人物銷鑠塵跡荒涼惟有江水千古萬古空流長

吊李白

君不見唐朝李白特達士其人雖亡神不死聲名流落  
天地間千載高風有誰似我今誦詩篇亂髮飄蕭寒若  
非甯中湖海闊定有九曲蛟龍蟠却憶金鑿殿上見天  
子玉山已頽扶不起脫靴力士祇羞顏捧硯楊妃勞玉  
指當時豪俠應一人豈愛富貴留其身歸來長安弄明  
月從此不復朝金闕酒家有酒頻典衣日日醉倒身忘  
歸詩成不啻鬼神泣筆下自有煙雲飛丈夫襟懷真磊

落將口談天日月薄泰山高兮高可夷滄海深兮深可  
涸惟有李白天才奪造化世人孰得窺其作我言李白  
古無雙至今采石生輝光嗟哉石崇空豪富終當埋沒  
聲不揚黃金白璧不足貴但願男兒有筆如長杠

題李白觀瀑布圖

天寶之亂唐已亡中興幸有汾陽王孤軍死馬跨河北  
手扶紅日照萬方凌煙功臣世爭羨李侯先識英雄面  
沉香亭北對蛾眉眼中已見漁陽亂故令邊將儲虎臣

爲君談咲清胡塵朝廷策勛當第一珪組不敢縻天人  
西遊夜郎探月窟南浮萬里窮楚越雲山勝地有匡廬  
銀河掛空洒飛雪醉中信馬踏清秋白眼望天天爲愁  
全閨老奴污吾足更欲坐濯清溪流英風逸氣掀宇宙  
千載人間寧復有夢魂飛度南斗傍笑酌廬山一卮酒  
雲松可巢今在無九江落照連蒼梧欲從李侯叫虞舜  
盡傾江水洗寰區

題李白對月飲圖

明月出高樹上懸青天中下有萬頃之長江揚波泛彩  
清若空江風吹人色凄凜此時對月誰能寢十千斗酒  
何足論舉盃宜就花前飲花前飲酒無與儔酒酣意氣  
輕王侯仰招行雲不可得但見月與河漢俱西流僊人  
伐桂樹玉女倚瓊樓顧盼暫相悅棄去終莫留昨日已  
浩浩今日復悠悠人生如飛光及時不飲空白頭君不  
見月中玉兔搗靈藥不能醫此萬古愁何如醉卧長不  
醒天地與我同虛舟混混六合間浩然何所求

徽宗花鳥圖

宣仁升遐司馬死宋祚當時已中否豈知禍亂猶未休  
更立端王作天子簡書四出捷星馳重見熙豐舊設施  
太室既崇荆國祀朝堂新刊黨人碑廷臣往往多鉗口  
四海禎祥無不有萬金寶藏造池臺千里樓船載花柳  
君臣自詫文德修不數唐漢追商周陳鍾考鼓按雅樂  
厲甲揚戈昧遠謀宮中從容萬幾暇酣飲逸遊忘晝夜  
御輦時過宰相家微行或飲倡樓下宣和殿內玉屏風

綺席金爐處處同  
詔遣內官宣畫史  
時拈象筆極形容  
神機密運回天巧  
萬歲齊呼盡稱好  
玉礮裝軸錦裁題  
墨署花書朱篆寶  
心怡意適藝愈良  
自道丹青過百王  
盡將兵籍付邊將  
還信奸臣斥俊良  
契丹滅後金人喜  
猶剖王封賞  
閣豎露布初騰紫  
陌塵天驕已渡黃  
河水  
汴京鎖鑰一時開  
雉扇驚興去不回  
圖書萬卷入沙漠  
奎壁無光天爲哀  
祗今俯仰三百載  
南北興亡幾更改  
廢陵已發社無基  
尺素誰家尚收在  
吾知此畫非人爲



當有神物常呵摩故留花鳥在人世要俾後來懲戒之  
古來君德在仁義小技雖工何足計不見昭陵一藝無  
偉績鴻名照天地

錢氏家山圖

錢君望鄉勞夢思陳君奮筆爲寫之毫端歛吸驅鬼物  
風霆捲地山川移紫雲峯高當面立獅子灘聲轉山急  
翠竹搖風市塵遠青楓夾路樵歌入山脚盤迴到石門  
桑榆深映數家村百年丘壠澤未泯中古衣冠今尚存

高堂老人年八十皓首紅顏瞳點漆柴門拄杖望兒還  
坐聽庭鳥心若失錢君一見增喟傷此身如在淮水傍  
摩挲門戶欲歸去細看無路墮渺茫乃知陳子善戲劇  
故假丹青惱胃臆世間萬事無不然畫地作餅安可食  
陳子亦是憶家客不特戲人兼自釋沙際扁舟已上檣  
何當共載歸故鄉

題南屏對雪圖

昔年歲莫京國還艤舟夜宿南屏山山風吹雲天欲壓

夜半大雪埋江關清晨倚樓望吳越六合玉花飄未絕  
恍疑江水駕山來萬頃銀濤湧城闕山僧好事喜客留  
置酒開筵樓上頭玉堂僊人宋夫子紅顏白髮青貂裘  
坐談今古如指掌共看雲收月華上寒輝素彩相蕩摩  
碧海瓊臺迭蕭爽酒酣擊節心目開慷慨弔古思英才  
荒祠古栢岳王墓廢湖殘柳蘇公堤一時嘉會難再得  
僊人上天塵世窄王子何年繪此圖正貌南屏舊遊迹  
吾知王也竒崛人新詩妙墨俱絕倫偶然揮洒豈無意

神授髣髴存天真世間今古同飛電回首人豪都不見  
空有羅山石室書夜夜虹光射霄漢

江山萬里圖

我昔奉勅辭金闕西下巴川持使節僊槎二月出龍河  
萬里春風掉晴雪吳江茫茫入杳冥棹歌初過峨眉亭  
錦袍不見李供奉白雲遮斷三山青烟蕪漲綠知何地  
白鳥雙雙沒淮樹片帆風滿疾如飛矯首驚看汭流去  
大孤小孤橫雪波匡廬五老青嵯峨九江秀色嘆奇絕

半空飛瀑懸銀河推蓬竟日閑吟倚瞬息舟移洞庭水  
君山如黛壓中流十二煙鬟鏡光裏好山遠自峨眉來  
瀟湘練明天際開疑峯九點落空翠重華孤墳安在哉  
武昌地轉多遺迹隔岸鳥鳴瞻赤壁烟焰旌旗魏武兵  
綸巾羽扇周郎策扶醉曾登黃鶴樓漢陽城對鸚鵡洲  
即從鄂渚擢明月沂流直上窺荊州夷陵山勢多重疊  
楚樹蠻雲遠相接欲向夔城入錦城還於巴峽穿巫峽  
神女峰前路欲迷瞿塘艷瀕聞猿啼五溪越盡見雲嶺

但見鳥道青天低萬里橋西看立馬足迹經遊半天下  
愧無草檄擬相如笑擲索金輕陸賈今年詔許臨丹丘  
夢中往往驚羈愁江山誰寫入圖畫眼中歷歷如經遊  
岸中一覽發長嘯滿襟爽氣高堂秋

題王叔明墨竹爲鄭叔度賦

吳下王蒙藝且文吳興趙公之外孫黃塵飄蕩今白髮  
典刑遠矣風流存華亭朱芾稱善畫每觀蒙畫必歎詫  
謂言妙處逼古人世俗相傳倍增價昔年夜到南屏山

高堂素壁五月寒壁間舉目見修竹煙雨冥漠蛟龍蟠  
呼童秉燭久不寐細看醉墨王蒙字固知蒙也好天趣  
畫師豈解知其意分枝綴葉人所知要外枝葉求神奇  
天機貴足不貴似此事不可傳諸師麟溪鄭君好奇士  
愛畫猶能賞其趣嗚呼世間作者非不多鄭君甚少可  
奈何

失硯嘆

吾家石硯玄玉色來自扶桑海中國盜摩日月露光精

吞吐波濤含潤澤天生竒質爲世用海王龍伯不敢匿  
少時得之方外人四座傳翫皆歎息二十年來親翰墨  
北走洙泗西梁益錢塘會稽屢遊歷鬼神呵護同瑛璧  
水怪山精皆辟易佐我爲文寫骨髓上探玄化與爲敵  
宣暢民彝輔皇極雲雨布濩飛霹靂倏忽變遷靡定迹  
謬致聲名驚四方招謗速侮不煖席其間損益兩相補  
硯也於余良盡職豈知萬事不可料昔者相親今不得  
潼關羣盜何太劇竊瞰行人俟昏黑金錢雖失不足歎



此硯使我深痛惜我非玩物有偏愛又非昧理苦蔽惑  
直傷美器不遇主有似賢才受驅迫真卿奉使陷叛臣  
蘇武持節幽異域忠肝義膽貫天地豈忍包羞汙凶逆  
孔子春秋至謹嚴細事不肯登簡策大弓寶玉二物耳  
特書盜竊懲亂賊我誅鼠輩恨無力著作有心裨六籍  
何時見汝生羽翼奮飛重來侍吾側不然變化爲星辰  
照臨下土當烜赫外物聚散如置弈胡爲念汝長戚戚  
君不見自我得之失無憾不如蕭公差達識

扇

寒藤陰壑懸風霜剝皮擣骨收溪光銀漢半邊秋月白  
瑤臺一幅春雲香青旗翠纛湘潭竹寶刀纖纖破寒玉  
東來十二碧琅玕鳳骨凝香冷盈掬吁嗟造化由天功  
乃知製作歸良工膠漆投情作鸞偶卷舒懷袖生清風  
清風飄飄可人意忽覺聲名滿天地南州溽暑恩愛多  
只恐涼颼入庭樹

紅酒歌

田家八月秋秣黃頰肩滿擔金穰穰西成萬室喜登場  
斗酒勞慶年豐祥天台山人傳秘方釀成九醞丹霞漿  
紫檀糟頭秋點長絳囊醅壓甘露涼猩紅顆滴真珠光  
蓼花色比桃花強薦新設席請客嘗風吹桂花滿屋香  
饌出肥鷄一筋肪橙斫蟹膾雙螯霜不須琥珀琉璃觥  
不須太白力士鎗我愛真率田家郎磁甌瓦盆罌水觴  
爛熳爲我澆吟腸新詩吐出雲錦章醉來興發恣豪狂  
高歌起舞當斜陽出門一笑爾汝忘大江東去煙茫茫

食羊虎肉

白額咆哮振山谷老羝見之驚且伏一朝強弱兩不存  
此肉都歸野人腹腹中惟恐相啖吞急呼美酒爲解紛  
酒酣一醉更懷古千載英雄羝與虎

蕨箕行

並海饑民千百數携鋤上山斲山土蕨根已盡斲不休  
力絕筋疲未言苦屋頭五日無炊煙十步九却行不前  
全家性命係朝莫弱子假息阿母眠昨日斲蕨僅盈斗

今日蕨根不滿手但憑斲蕨保餘生再拜青山感恩厚  
青山青山爾勿猜明朝未死携鋤來

海米行

海邊有草名海米大非蓬蒿小非薺婦女携籃晝作羣  
採掇仍於海中洗歸來滌釜燒松枝煮米爲飯充朝飢  
莫辭苦澁不下咽性命聊假須臾時皇天不仁我當死  
况乃催科急如矢來牟擬作日月期欲保餘生更奚爾  
嗚呼棄止不復陳椎牛酣酒爲何人

遊峨嵋

楚客求丹梯，泝流三峽踰。五溪浙僧訪，佛祖一錫凌空  
向西土。江左儒生尋，謫仙相逢共。上峨嵋，巔峨嵋，山高  
氣磅礴，萬朶蓮開青。插天天高地，遠望無極海。東日出  
扶桑，赤氣衝衲衣。舉光搔角巾，明眼底。汪洋巨鰲動，耳  
邊髻髻天鷄鳴。龍宮對月窟，曾聞謫仙遊。霞光凝不散  
履迹，今尚留。千崖崩摧勢欲墮，羽流緇侶參差坐。七寶  
巖留供佛燈，萬松竈起燒丹火。風霆蕩瀟雲樹，模糊虎豹

接跡猿猴鬪呼星漢當頭手可摘靈芝甘露無時無雲  
漏日兮光一線金蓮白象紛紛而來見萬籟動分天  
樂和仙之人兮夜經過忽神驚而目眩豈事幻而說頗  
覩謫仙而無有杳鳳管與鸞車塵心未斷懷鄉土青鞋  
復踏來時路行行回首語青山石室無鎖門無關重來  
有日當躋攀肯效赳赳嘒嘒徽名勢坐令塵土凋朱顏

題萬間室

少陵老翁餓瀕死意欲大庇天下人一椽茆屋不足蔽

風雨安得萬間之厦蓋覆四海赤子同欣欣言狂意廣  
不量力至今世俗間者交笑嗔侯城小儒愚獨甚不敢  
嗔笑謂公之意厚且真古來致亂皆有因大臣固位謹  
持祿其計止爲安一身高車大纛耀侈富子女玉帛驕  
里隣安危得失百不知更借膏腴便利田宅遺子孫生  
靈窮苦墜溝瀆寒士困悴無衣紳彼也珍羞綺席歌舞  
燕樂窮朝昏老翁哀痛實爲此熟視鄙夫儉子辟之犬  
鼠加冠巾曰我得志有不爲嫉邪憤世欲救其弊忘賤



貧至今已閱八百歲知翁之意世獨少蹈翁所惡常紛  
紛侯城子爲是懼人受天地中何以不與禽獸草木爲  
等倫一心運萬化五性涵義仁下補后土所不能上贊  
皇天之闕變調寒暑撫五辰大禹疏百川伊周綜理禮  
樂政教與世爲陶鈞孔子孟軻不得位著書明道亦與  
治水拯世之功均吾爲孔子徒恐汨流俗同沉淪故題  
一室曰萬間坐覺宇宙亭毒氣勢皆前陳身賤不敢論  
政教誓將修復孔業爲世開昏闇室中左右列古書亦

有諸史所筆志義之士忠良臣闕有子厚洛有伯淳羣  
公近出皆鳳麟美哉子厚西銘之說何諄諄吾恐當時  
亦感悲歎意故立此論可與日月同光新爲君不知此  
無以建皇極爲臣不知此無以康兆民願寫此書千萬  
卷洗濯鄙曾與私智使知林林之衆皆吾共出而同娠  
視之不至越與秦盡變呻吟愁歎之俗若去寒冱逢陽  
春小儒不惜獨困處此室作爲雅頌歌聖神再見中國  
大治同周殷

滄州趣爲台城趙生孝禮題

少年負竒志味道輕神僊縛虎千仞崖斬蛟萬里川東  
指扶桑西月窟以手捫天問天闕醉中欲奪羲和鞭驅  
策六龍下溟渤歲華忽復晚竒功竟無成耻作楚狂人  
甘爲魯諸生俯首蓬屋中被褐勘六經憂多髮白早觸  
事萬感盈擬從安期輩採藥遊蓬瀛蓬瀛羣仙別來久  
間知掉頭還拍手世上憂勞早已知身後功名復何有  
棄我如敝屣不肯相攀援登高發長嘯目送白鶴歸三

山我友王子喬示予海嶠圖孤峯拔出數千尺丹光雲  
彩交模糊下臨無地上極無天漚波浩蕩望不極恍若  
巨鰲掀舞勢與元氣同回旋金銀宮闕隱倒景翠綃絳  
節在眼前對此愜心賞便欲乘風與俱往恨乏同心人  
臨岐獨惆悵趙生天資妙訪我東海頭清談雄辨有仙  
趣坐覺毛骨寒颼颼生方讀書取青紫我已屏跡棲林  
丘他年謝事倘相會與爾共作蓬瀛遊

許氏龜巖行

寧海許子名續字士成年踰三十事母以孝稱士成六  
歲失嚴父母氏祿抱避亂慈溪城于時鯨鯢奮擲東海  
沸紅塵滿天波血腥流離異鄉幾寒暑慈母守義志節  
如霜明盜平歸來閭里驚母能愛子復善教紡績衣食  
使入庠序拜揖從先生所學在大倫耻以文藝鳴家居  
近市母不樂又爲迎至龜巖之下養且耕兒壯母髮白  
諸孫長大能扶王母行士成歲時奉觴爲母壽踰躃拜  
舞同孩嬰食有黍稻穀有牲母氏感舊涕泣難爲情士

成念母守節苦身賤莫達天子廷每爲鄉閭道母事辭  
旨悽咽弗忍聽縣令不之察郡守不爲聞朝家有命誰  
能旌悲哉士成之恨何由平嗟嗟今之人豈無高車大  
馬垂華纓推恩及父母丘壠沾光榮立身奉法不能謹  
雖有恩寵無由承身死汙辱增宗族愧醜父不願以爲  
子弟不願以爲兄孰若士成隱居不仕行修于家馳令  
名龜巖土厚且沃龜巖水甘且清龜巖之人誰與許子  
京許子之賢母所令鄉人祝許氏母子年百齡母爲人

婦法子爲事親之準繩嘉爾母子孝且貞龜巖之高與  
天俱不傾樂哉士成配巖永久流芳聲

蜀道易

有序

昔唐李白作蜀道難以譏刺蜀帥之酷虐厥後  
韋臯治蜀陸暢反其名作蜀道易以美之今其  
詞不傳臯雖惠於蜀民頗以專橫爲朝廷所患  
暢之詞工否未可知推其意蓋不過媚臯云爾  
非實事也伏惟今天子以大聖御極殿下以睿

哲之資爲蜀神民主臨國以來施惠政崇文教  
大賚臣僚及於兵吏內外同聲稱頌喜悅天下  
言仁義忠孝者推焉西方萬里之外水浮陸走  
無有寇盜商賈駢集如赴鄉閭蜀道之易於斯  
爲至矣臣才雖不敢望白而所遇之時白不敢  
望臣也因奉教作蜀道易一篇以述聖上及賢  
王之德名雖襲暢而詞無溢美頗謂過之其詩

曰



美矣哉西蜀之道何今易而昔難陸有重巖峻嶺萬仞  
鑿天之劔閣水有砒雷掣電懸流怒吼之江關自昔相  
戒不敢至胡爲乎今人操舟秣馬夕往而朝還大聖建  
皇極王道坦坦如絃直西有雕題金齒之夷北有氊裘  
椎髻之貊東南大海際天地島居洲聚千萬國莫不奉  
琛執贄効朝貢春秋使者來接迹何況川蜀處華夏賢  
王於此開壽域播以仁風沾以義澤家和人裕橐兵斂  
革豺狼變化作騶虞蛇虺消藏同蜥蜴鑿山焚荒穢畧

水剷崖石帆檣扉履任所往宛若宇宙重開闢美哉蜀  
道之易有如此四方行旅絡繹來遊西覽德成都萬室  
比屋如雲桑麻蔽原野鷄犬聲相聞文翁之化孔明之  
仁嚴鄭之節揚馬之文遺風漸被比鄒魯士行賢哲方  
回參方今況有賢聖君大開學館作校論典墳坐令政化  
希華勛徵賢一詔到巖穴吐爾四方之士孰不爭先而  
駿奔王道有通塞蜀道無古今至險不在山與水只在  
國政并人心六朝五季時王路嗟陸沉遂令三代民盡

爲獸與禽當時豈惟蜀道難八荒之內皆晦陰戎夷雜  
寇盜干戈密如林今逢天子聖賢王之德世所欽文教  
洽飛動風俗無邪淫孱夫弱婦懷千金悍吏熟視不敢  
侵蜀道之易諒在此吐爾四方來者不憚山高江水深  
爲玉泉山人題

天地直接扶桑東百川委會來無窮兩崖爲門障海口  
大江中流潮汐通豐山橫鶩東奔放浪嚙沙崖穿玲瓏  
翠鳳飛來白銀闕金鰲湧出金蓮宮天台赤城此磅礴

間氣往往生英雄鴻儒碩士世不乏神靈秀異天所鍾  
玉泉山人獨嗜古食貧力土專而工結廬椒江望蓬島  
坐看海氣浮青紅含嚼英華噉芳潤吐納光景噓長虹  
羣仙窈窕羅几席洪波浩瀚涵心胸蕞爾一鄉不滿意  
邈焉四海將奚從日披黃卷對賢聖上並周孔齊羲農  
國風雅頌導于正典謨訓誥操厥中權謀智術競趨利  
玄談清議咸歸空濂洛崛起樹名教千載道學開盲聾  
仁義行師佐伊呂禮樂出治登夔龍拯救生民布仁化

此心炯炯今昔同食息夢寐若見之上下議論相磨龍  
論交豈止一世士直追三代還淳風屈伸去就隨所遇  
仕止進退皆從容某山某水吾釣遊歸來舊隱巢雲松

次河南府梅花堂韻

前年停車汴水陽鄭公延我政事堂是時梁國花亂發  
遊蜂乳燕春滿牆綠酒浮觴面玉白繡衣耀座腰金黃  
豈知造化不容物俊傑俄爲土中骨重來訪舊無一存  
冠蓋年華兩飄忽堂中遺跡傷人意粉圖素壁銀鈎麗

道廣常懷濟物心數竒竟負匡君志文章爛熳空自苦  
政術廉平索誰繼官僚薦書嗟我遲妻子思家歸未遂  
感此臨風涕淚垂出門上道風塵翳西行境內五百里  
到處逢人稱善治洛陽城中迎歲新正思昔日梁園春  
河南忽過張少府意氣還同鄭老真蠟梅盈庭花瑤璨  
銀燭照夜光璘珣登高訪古隘八極勸酒笑談驚四隣  
我被虛名浪羈束奔走皇皇炊不熟明朝又渡瀍水西  
行李再經燒棧北丈夫會合當有時各展忠貞報王國

東河驛值雪次茅長史白戰體韻

東河氣高地常冷越客入山愁日暝蹇驢破帽闖驛門  
敝屋踈籬耿燈影更闌藉草始一寐夜半雪來初未省  
窻明恍訝烏繞樹身倦宛同蛙伏井鷄鳴起看眼生花  
睡熟山童呼不醒積深已覺擁藍關勢遠直疑沾庾嶺  
穿簷入隙如有求塞戶填堦豈須請瓦溝早滴爲炊煙  
水面難消因泛梗樂事偏宜壯士獵清氣先入詩家茗  
平鋪道路混險夷蓋覆乾坤掩瑕青空山難行無客到

高卧閉門終日靜  
春來一月尚嚴凝  
天上何人調九鼎  
半生對雪走四方  
竒絕愛此林壑景  
長松壓重龍虎怒

巨石羅陳

闕

整北風未勢更飄揚  
斜炤餘輝愈光炯

南望殊憐京闕遥  
西顧頗覺歸途永  
未須翫物遽憂患  
有形易化皆幻境  
明朝陰翳盡掃除  
天際諸峰翠相並  
乘興伸眉且一笑  
人生饑寒非不幸  
莫將詩句效蘇公  
淮陰詎肯儕噲等

愛日堂



白日麗青天朝出扶桑莫虞淵堂上有親雪滿巔坐看  
白日心茫然長繩不可繫急景如流川羲和羲和停爾  
鞭高堂一日如千年

寄貧

朝餐漿一盂莫食蔬一盤胸中六經粲星斗筆底萬卷  
馳波瀾人笑先生窮不耻先生嘆人愚可鄙終朝醉飽  
百不知何異腥羶飫螻蟻世上羣兒昧重輕每是螻蟻  
非先生縱令先生窮至老猶與日月爭光明

覽以德用中二友和東坡喜雨之作

席前衿佩多如雨危坐談經亦良苦講堂日宴未朝飡  
舌捲唇黑面生土小齋退食聞扣門倒屣起迎咽還吐  
知是兩賢送詩至笑却杜康麾陸羽錢也駿馬氣莫當  
陳也奔泉勢難禦元祐詩壇不易登俱欲升堂啟其戶  
文章繇來闕政教道術何曾間今古每憐陋儒不自量  
詆訶前人竟奚補浪與唐宋較優劣有如癡兒侮厥母  
蘇公風骨真天人駭視四海手摩撫二南洋溢騶虞出

九韶鏗鏘鳳凰舞列僊得道行御風漢相閑居老食乳  
神奇變化脫邊幅怒罵嘻噓皆新語眼中不復見此翁  
雲月江山澹難主我狂自少喜翰墨辟若惰農服田畝  
嘆彼么麼星辰出望公光燄日當午二公豪健敢扳附  
蓄積穰穰富倉庾大篇屬和意有餘坐覺詩名動城府  
當今聖朝任英俊雅頌再作聲教普吾衰才薄字勉旃  
振起斯文繼前武

渡淮後寄宗文先輩及諸士友

長淮風顛浪雷吼爭渡千人喧渡口蹇驢破帽衆所輕  
行李甘心落人後臨淮先生交義深視我重比雙南金  
席前弟子總英俊相携擁餞淮之陰就中孫玘藝且勇  
奮袖登舟氣增重扶顛禦侮況有人病身幸免波濤恐  
掛帆長嘯煙霧開主人謝客緣城回孫也追隨不憚險  
艱危可仗真竒才世俗結交看勢利有勢相依無即棄  
賤貧如我豈足憐脫落凡情見真意賢豪邂逅何所無  
排難多由竒丈夫古人事業望公等欲輔國步須捐軀

次鄭好義紀夢韻

有引

昨承寄示紀夢長句諷詠之餘不勝感歎因用  
增至二十五韻以道鄙懷答雅意尚正教之

竒材偉人世不作太息斯文付冥漠承君忽枉紀夢篇  
喜極長吟淚交落雄辭璀璨錯迸星斗險語鏗訇飛電  
念我雖知意氣真感君復使情懷惡憶昔與子在京師  
玉堂老僊侍幃幄冠蓋追趨禁闥深朝廷尊寵禮數渥  
聲名如雷動天地震起蟄虫伸屈蠖國有著龜民有師

水之海濱山之嶽升堂執業集英彥寶帶朱衣雜南朔  
朽材浪跡偏見憐繩墨匡持重礮斲子時好修美文藝  
清談劇辨相娛樂公於多士雖並收視我與君尤不薄  
龍驥咸歸伯樂廐天球本出荆山璞要爲國家樹基址  
屬望吾人興禮樂安知垂老萬里行直沂岷江踰劍閣  
死生契闊恩義乖音書隔絕道路邈索居卧病東海上  
舊德棄捐徒歎忤夢中見公疑尚存雅度高風儼如昨  
公之神明在宇宙陟降照臨焉可度或乘鸞鳳駮麒麟

或奏韶夏陳羽籥鈞天清都足豪俊講道論文恣歡詭  
應悲我輩混世塵俛首顰眉語伊喔獨念靈櫜客西土  
明詔未許歸故宅昔蒙召見欲奏論造次自疑難感格  
聖君需澤覃萬方寧使遺骸葬夷貊子文無後善人懼  
馬遷有書心事白所憂陋拙忝知己昭雪孤忠負前諾  
公心豈不望後人入夢語子意甚確子兄文章極醇雅  
典國製作名烜赫為銘功行播遐邇可配史傳垂簡策  
子將繼踵綰章綬便當任此千古託如吾自料乏時才

空言駭世徒宏廓水北山南結茅宇弟唱兄酬老耕獲  
著書倘可寓王制未死尚期明聖學與子他年擬見公  
公歸應化遼東鶴

寄修德

平生識字不滿百浪竊聲名有慚色反觀身世每自鄙  
何以使子心莫逆前月馳書許訪我恐我無錢厭賓客  
惠書問疾繼踵來為賀更生重悽惻我力不能事耕稼  
性又不耐營官職承明辭歸茹菽糗侯封鼎食誰願易



今年瘧鬼忽侵凌寒熱交爭類勅敵垂頭伏枕二十旬  
腰腹枵羸面如腊噤乾恃粥不善飯下牀須扶還按壁  
向來意氣隘九州項步顛躓真可惜所忻元兄督家政  
甌石無儲免憂戚抱書歎卧困即眠見客暫起饑輒食  
萬事盡拋思慮表一身豈卹饑寒迫古來賢豪例窮苦  
屠兒販豎千金殖皇天子奪有深意衆生淺闇何由識  
君來不須念我貧厭飫仁義非外得薄田近獲十斛麥  
炊之作糜可朝夕溪南磐石廣數仞墻頭新筍高百尺

竹間讀書石上卧青雲爲蓋苔當席頗聞海上有巨鰲  
鼓舞洪濤氣腥黑請君持竿亟一掣膾肉作脯如山積  
盡俾黔黎飽君德與君大嚼醉千日免使窮愁惱胃臆

送劉士端歸括蒼

憶昔高皇定華夏海內遘屯龍戰野幟幄謀謨三數公  
君家中丞最瀟洒軸轡十萬搗虛來帆檣蔽空聲吼雷  
從容決策掃強寇手扶日月滄溟開盜犯洪都突彭蠡  
砲石星流湖水沸御舟閣河諸將譁神箭穿顱逆首斃

是時中丞謀畧精指揮英傑江南平掀髯撫掌談世事  
天子稱善羣臣驚寰區混一定勲賞鐵券金符頌土壤  
中丞獨擅翊贊功賜號每為諸伯長青田宰木三十年  
高皇僊馭亦賓天國初故老尚誰在幾人事業圖凌煙  
忽見聞孫三歎息秀目踈髯遺像逼擬樹豐碑墓道邊  
欲請天朝重褒錫至尊含笑問近臣先帝功臣今有孫  
胡為拂衣入山去肝食未敢干君恩海內只今無盜賊  
幽州興兵惱邦國廟堂謀議豈無人我懷中丞淚沾臆

嗚呼志士古所稀留侯武鄉今是誰九原招公倘可作  
爲解四海蒼生危

題王節婦

妾入君門知有夫夫雖不幸夫子孤人生必死死即已  
大義一失將安圖爾有金如山我有心匪石頭髮可斷  
頭可得以死報夫奚所惜幽哉猗蘭芳在彼澗水湄荆  
棘非不繁永終保令姿千秋萬載苟可滅白日成塵海  
成血

楊節婦

良人贈我明月珠永託團圞誓無違  
豈期生子髮未髻竟以王事捐其軀  
妾身既作楊家婦撫此孤兒事堅守  
明月之珠深自藏千金不落他人手  
青絲髮斷今復長妾心直與珠爭光  
推門鬻市卒不售死將地下還阿郎  
玉堂學士文章伯為發幽貞播金石  
千載少似曹家妻凜凜遺風可相敵

題許節婦傳

渭水不可濁豈與常流俱節婦不可辱自與常婦殊節  
婦之節良可書書出大手名斯垂嗚呼竒花異卉人難  
植瑞麥嘉禾不可常種得

寫懷

子規聲裏吳蠶熟星繭纍纍照人目踏車已作春雷鳴  
我獨無人冷機軸繭老蛾飛爭奈何愁端零亂如絲多  
故人一去不復返徒有血淚如春波新婚已盟未諧耦  
青鳥傳音在春後青春會少離別多心事殷勤向誰剖

君不見古井淵源百尺深  
欲汲未得勞人心  
井深百尺君莫恨  
但恨繩索無千尋

聞鶻

不如歸去不如歸去  
一聲動我愁  
二聲傷我慮  
三聲思  
逐白雲飛  
四聲夢繞  
荆花樹  
五聲落月照  
踈櫺  
想見當年  
弄機杼  
六聲泣血  
濺花枝  
恐污塔前  
蘭茁紫  
七八九  
聲不忍聞  
起坐無言  
淚如雨  
憶昔在家  
未遠遊  
每聽鶻  
聲無點愁  
今日身  
在金陵  
土始信  
鶻聲能  
白頭

律詩

懿文皇太子輓詩十章

盛德聞中夏，黎民望彼蒼。  
少留臨宇宙，未必媿成康。  
宗社千年恨，山陵後世光。  
神遊思下土，經國意難忘。

文華端國本，潛澤被寰區。  
雲繞星辰劍，春回造化爐。  
變通周典禮，寬大漢規模。  
厭世嗟何早，蒼生淚欲枯。

監國禪皇政，憂勞二十年。  
龍樓方愛日，鶴馭遽賓天。  
已失羣生望，空餘萬世傳。  
長江一掬淚，流恨繞虞淵。



相宅圖方獻還宮疾遽侵鼎龜懸寶命笙鶴動哀音誰  
紹三皇治徒傾四海心關中諸父老猶望翠華臨

三朝兼庶政仁孝感嬰孩萬歲千秋志經天緯地才未  
登宸極定恐見泰山顏聖子承皇業能舒四海哀

懿文光典冊善美過昭明歷數歸元子哀榮慰聖情神  
靈遊帝所陵寢鎮天京公論當時定千秋有頌聲

虹光流渚日五馬渡江年聖質中興運天倫位正傳德  
隆尊未極仁與壽難全餘慶垂中古皇家世有賢

淵默師成憲端嚴信若神承天行日月與世作陽春銳  
意思寬政溫顏訪老臣至今江海士猶想屬車塵

六龍猶未御萬物已昭蘇使處尊崇位應無凍餒夫不  
知天上樂還憶世間無八極遨遊暇踟躕顧帝都

斥土開瑤殿因山近翠微神輿離鶴禁天淚濕龍衣日  
月還丹闕風雲送六飛太平皇業固清廟詠光輝

右十詩蓋以寫臣子之至情而寓攀號迫切之意未嘗敢以示人今以記事靈殿造舍第以諸

生來見感泣乃書以與之然辭之卑陋而事之  
隆重身之踈寡而道之崇高宜其不足以形容  
之也

大行皇帝輓詩

睿哲君天下恢弘德化新宵衣圖治道側席致賢臣  
王氣金臺曉仁風玉宇春忽朝雲晏駕率土淚沾巾

謝蜀王撫問賜藥六首

有序

臣伏承睿恩撫問兼賜良藥及臯比講席拜受

之餘無任感荷敬次滕訓導所寄詩韻粗述瞻仰之誠辭句蕪拙乞垂宥察而正教之幸甚

超悟天人際從容禮法中豪端錦江水塵尾雪山風善共東平樂才看冀北空感恩慚獨厚箋疏許頻通

壤地三千里絃歌五十城廷多漢長者座有宋者英立事多師古行仁不近名願存無逸戒佇見治功成

聽政憂民切虛心待士虔典章皆有據談笑總堪傳夜月初筵酒春風廣廈羶小臣懷德處每憶白駒篇

大名傳海宇盛德冠時人文字天垂象姿顏嶽降神仁  
施邦域遠年與憲章新願沐恩波濶花溪理釣緜

賢王思賤士欲爲制顏齡藥授還丹祕功存本草經駐  
顏唾鑷白鬢歲比冬青倘遂飛昇去長依傳說星

服猛本王政賜皮書閣中林泉眼如電文采座生風似  
可講周易寧須喚小空深思避賢者玄理未能通

應召赴京道上有作三首

搖落秋冬際蒼茫鄞越間青山欹枕過白鳥背人還問

俗鄉音異消愁酒價慳虛名果何物不使病夫閑

官程催歲暮百尺可停牽煙浦高低樹晚江來去船青  
山過越少滄海帶吳偏所遇無親舊懷人興眇然

客路喜暄暖初冬天始寒近京風俗異逆浪水程艱人  
語吳音雜漁歌楚調酸畏途非好友懷抱若爲寬

病中述懷二首

卧病知爲國尤須謹未形盛強多過計安逸每傷生變  
理宜修政醫治乃用兵但令元氣固四海樂昇平

故交憐抱病意厚數相過憂患人難免方書俗易訛衛  
生功莫就醫國理如何但喜心無恙斯民疾更多

送盧信道漢中點兵

喜子東南秀照人眉宇清早探經濟學已負老成名治  
世難忘武邊城要足兵關河雖跋涉歷覽快平生

題萬間室

一室纔函丈何緣號萬間靜中存太極圖裏看人寰舒  
卷心無外經綸意自閑誰能同此樂魚鳥亦歡顏

題曲徑

曲徑潛通市高墉遠背村醉眠忘作客靜讀懶開門古  
學嗟中絕羣經續已繁平生刪述意深恐負乾坤

次韻奉寄好義五首

真齋至出見寄詩甚憫懸渴諷詠不能已因借  
韻述懷邑中還同宿偶作一首今并錄上

初旭濕霜痕溪流緩復奔路因頻到熱心待舊交論山  
勢隨村曲窰煙接海昏知君多善教所至俗還敦



聞說幽居僻，僂髮翠崦南。陽坡饒美木，曲澗會澄潭。問俗何方古，藏名此地堪。深期帶經往，清夜擁爐譚。

野性便時棄，虛名耻世間。目緣多慮暗，志爲好奇分。傍日翻書卷，臨池寫練裙。思君同雅興，搔首誦停雲。

混俗非真隱，深居學避囂。看雲山映竹，坐石水通潮。道勝貧何病，神完趣獨超。遺經對千古，意頗似聞韶。

草沒塔前石，雲連戶外山。位居人下拙，身在病中閑。出處多難事，逢迎有瘦顏。仰看雙白鶴，暮向遠林還。

歲暮寄王修德先生二首

杪歲垂垂盡  
寒花悄悄繁  
律回春有信  
冰動水生痕  
樸學慚經濟  
窮居廢討論  
都將百年意  
一笑付乾坤  
長嘯茅齋窄  
清談酒盞空  
天寒爐擅寵  
歲惡甑無功  
計拙居鳩上  
身癯訝鶴同  
燈花笑愁絕  
故向夜窻紅

承宜隱友兄同還精舍賦短律五首為別

風檻臨溪敞  
幽人稱隱居  
高松偏宿鷺  
濁水最多魚  
隣父邀嘗酒  
鄉豪笑著書  
時艱知己少  
來往莫教踈

携友踏溪沙同尋隱者家雨多知損麥土暖喜宜瓜身  
願明時棄文慚世俗誇旅懷難一笑撥遣付流霞

於世吾何補論心子最知叫闈他日恨感事百年悲地  
主能投轄天閑幸脫羈談經深夜坐涼月在清池

情深難遽別送遠却同歸衣濕洒塵雨路經垂釣磯山  
童迎客慣國士似君稀且復聽雄辨前賢賴發微

千載康成學羣賢惜異時典章秦火盡禮樂漢書疑聚  
訟吾何敢承家子莫辭從來參筆削萬一補民彝

次韻荅錢文學二首

幽亭斜日在佳興與君同  
展潤催詩雨衣涼醒酒風  
鵝羣穿草白蜂足帶花紅  
愁散身殊健全寬雲夢胸  
雲山留客住尊酒賴君同  
照影林端月清心水面風  
醉書詩草黑笑剪燭花紅  
不是聽雄辨難消磊砢胸

題畫二首

得意支郎畫分明是米家  
亂雲浮雜樹遠渡卧枯槎  
白屋孤舟迴丹崖一徑斜  
何時共漁叟洞口訪桃花

曲折成千里雲山儼一鄉林踈茅屋見水落釣舟藏世  
路羊腸外仙家鳥道傍此身何處着箕穎意難忘

寄童伯禮二首

俗薄吾深厭家肥子孰過孝慈諸弟共才俊一門多處  
世難同衆居鄉本貴和古來修禮讓盜賊尚投戈

忝肉屢來饋寸心殊自憐傷庶增我過尚德貴君賢握  
臂知身瘦指書待病痊每懷徐孺子衰世道能全

催菊

蚤帶春泥種頻添沃壤培如何九日至不見一枝開時  
過花何補天寒客懶來便須連夜發莫負掌中盃

代菊荅

生意本天得無人亦自芳但能娛晚節何必媚重陽服  
食多延壽風霜獨擅場祗應夷皓輩心迹可相忘

過北山翁

避世慚無術忘年賴有翁山中九日後花下一尊同江  
迴宜秋色林疎怯晚風放懷甘取醉舍此更誰從

送鄭履順二首

病卧思親友幾人能見過  
天寒念我至風義覺君多  
取士周三物論才魯四科  
相期曾閱上歲月莫蹉跎  
學是千秋事文非一藝卑  
古來傳道術誰免假言辭  
魯史三王政周官百世規  
知君美才氣慎勿負深期

峨眉縣曉發次韻

渡水籃輿穩穿林草徑微  
勝遊方外得樂事世間稀  
風過欹僧笠雲來掛道衣  
山靈應待久好去莫相違

謝羣公送別

賤士何須送羣公，不世情聽鷄朝謁後。  
並馬出郊行，心戀金門遠。身依玉樹榮，愁來今夜月。  
兩地向誰明。

道中遇盧先生

先生獨無慮，作客竟忘歸。謾把詩書閱，寧知世事非。  
秋風吹落鴈，江樹隱斜暉。少立橋邊路，相思恨久違。

春和五首

幽人遊澗谷，芳譽動京華。暫食高山蕨，終簪上苑花。  
醉



歌辭激烈老態影欹斜願得萬間厦轉爲寒士家

山深諸藏殖海廣百川歸材蓄廊廟器文張錦繡機魚  
龍將遠化鳧鶴漫齊飛爲愛賢名久人間萬事非

慨余徒就老羨子早馳名幽谷遷鶯語九臯孤鶴聲課  
蒙聊給膳教子力勤耕身世相忘久山猿總不驚

念子身宜隱憂時志復存騰章吐直語索句發竒言燕  
雀爭栖鬧豺狼鬪食喧寧知陶靖節適意向田園

鄭生瑚璉器曾住此林丘死骨今埋土新阡誰樹楸百

年愁莫遣一夢樂誠優惟念雙親老無能爲爾謀

寄處州教授蘇平仲先生四首

懷舊輕千里無書遠七年論心思盡地會面極升天名  
重連城價文雄萬斛泉何時絮卮酒紀德浦陽阡

舊習深知誤虛名久自羞故人猶比數文苑昔同遊  
女遺言絕胡公學制優料君施善教才俊滿南州

蘿山同業士存沒兩無聞未盡人間用寧修地下文  
劉郎應屏跡鄭谷自清芬搔首看征鴈天寒遠索羣

昔過東陽縣知君近始來留詩徒屬和無計復邀回賴  
有梁園客同傾杜酒盃死生星散後感舊復憐才

二十九日三首

揮淚劬勞日持觴孝義門敢承千古託恐負二親恩善  
頌慚諸彥傷懷望九原寂寥生意盡空愧此身存

野人哀感日天子戊辰年已負懸弧意空吟陟岵篇病  
身難報國歎歲欲求田築室依先隴將心訴九泉

就木悲賢傑持家賴哲兄三人嗟莫並一世竟何成毀

壁千秋痛看雲此日情遙憐小兒子念我倚欄楹

遣病十首

冬瘧春仍壯身羸氣覺虛  
臆乾祇食粥眼眩廢書行  
步兒童笑形容老病如平生  
千古意獨在悶難舒

病疴當歲晏冬去病猶存  
氣弱翻多汗心虛苦畏暄  
此生應有命萬事可忘言  
向晚移書卷微吟卧負暄

底用憂微疾人多悔久生危  
機非畎畝高枕豈公卿  
千古斯文託羣經此日情廢興  
天命在得酒且須傾

惡雨張燈夜匡床伏枕時  
食貧宜客少身病願春遲  
道豈斯文著才非聖世遺  
用心耕鑿外榮辱竟何施

久病諸人問深居四壁牢  
故交貽善藥姻婭饋醇醪  
厭虛名絆貧知道高時來  
稍暄暖斟酌減綈袍

二月風猶勁寒生滄海波  
呻吟知夜永羸憊損天和  
行覺冬衣重眠妨夜食多  
百年強壯日排悶付高歌

出戶迎人倦投床散帙迷  
牽衣嗔穉子煮藥愧山妻  
葛令尋勾漏梅生入會稽  
病思方術士亦似阻雲泥

春風已兩月閉戶不相知百舌強言事衆芳空滿枝官  
途多世難卧病亦天時應有簪纓者低頭羨我爲

飲酒留盃底攤書礙枕旁人扶修冠櫛容勸罷文章穀  
雨催田父花時到海棠病夫渾不較流轉任春光

病久身渾憊醫踈術易窮囊空宜勿藥跡滯尚飄蓬禮  
樂周秦後乾坤橐籥中數行憂國淚江海與俱東

童景純來二首

千古劬勞恨三冬瘧癘餘故交猶記憶尊酒問何如拜

倩人扶答文教子代書何時減藥餌一笑百憂除  
歌枕雨聲歇竹間鳥鳴病惟愁是伴閑與懶相成墮  
地驚茲日終天負所生一杯魚菽祭悲感淚縱橫

贈鮑民瞻

學道懶言文君文思不羣雪消三峽水波漲一川雲出  
處存文彖經綸在典墳莫名詞苑傳須立濟時勲

哭吳樗庵先生五十韻

夫子嗟淪喪鄉閭頓寂寥百年遺老盡一代典刑銷在

昔朝廷盛諸儒學業饒著書磨歲月抗論切雲霄獨步  
才偏壯清時俗未澆翟門人競集鄭驛客嘗邀冠蓋來  
千里牲牢具一朝柳營嘶騷裊茗椀捧妖嬈家釀傳荷  
葉溪鮮貫柳條醉猶親簡策樂不爲簞瓢晚節趨王命  
顰眉逐使軺將軍開幕府畫諾任賓僚燕薊藩翰重兵  
戎節制遥宣威增國勢褫魄遯天驕絕漠清烽火前驅  
奏鼓簫歸田心戀戀解組思飄飄松菊猶堪理桑榆幸  
未彫散金思效廣擊壤願歌堯紗帽長蒙首銀章懶束



腰吟哦今李杜吐納古松喬勝會無虛日清談或屢宵  
小心親里閑避咎狎漁樵名美偏招謗年高未免徂關  
牛噉孔雀孤鶴畏鴟鴞媚竈慚何枉懷沙恨莫消事隨  
東逝水迹斷舊題橋素櫬還家慘總麻聚哭噀可憐嬰  
世網本不負天朝盛德知誰繼冤魂謾擬招園林春黯  
淡風雨暮飄飄致遠悲良驥搏空憶皂鵬間喪皆頓足  
知己自垂髫秀句時稱賞華筵必辱要吟成珠滿紙坐  
久斗回杓適意魚依藻搜竒翠映茗劇談衾每共痛飲

燭頻燒髮爲工詩白心緣慮患焦豈知埋玉樹常想報  
瓊瑤劍許何當掛琴存久不調已同麟斃魯空待鶴歸  
遼官忍題朱旒家間賣黑貂徑荒泥蚓出池廢雨蛙跳  
隆替天難問災祥理匪昭聖賢從古歎憂患幾人超女  
在難同祭身危不類晁知音俄頃失抱疾轉無聊蜀魄  
三更月胥江萬古潮誰能名季札應解訴臯陶痛絕生  
芻莫哀傷壞木誣空齋暮聞笛揮淚向風颭

次危紀善五十韻倍成千字獻蜀王有序

臣幸侍燕閒叨陪論講於道德之奧雖未敢窺  
然不可謂不知其一二近閱危紀善五十韻排  
律詩因次其韻意有未盡輒復增加厥數倍之  
成一千字上進蓋以紀事實而昭聖世之盛美  
非欲效詞人墨客以靡麗爲工也伏惟賜覽觀  
焉

歷數歸真主皇威定八荒奉天頒正朔截海統封疆建  
國遵姚姒貽謀鄙晉唐德星臨井絡全蜀仰賢王白日

開金殿紅雲綻繡裳興圖文獻域城闕武擔陽地秀多才彥田腴足稻梁十年藩輔重萬里幅員長南土通滇  
輦東陸帶沔湘周封元過楚禹貢舊稱梁盛德超中古  
高名冠四方擎天爲柱石瑞世比鸞凰禦衆樞機簡臨  
朝禮貌莊正冠居便座決事處齋房實踐循規矩精思  
入混茫小臣名盡記直士諫無妨該博尤知要英明匪  
過剛羣書陪几席前哲儼英塙旦奭宜方駕間平合侍  
傍事神孚盼嚮欽聖祝穹蒼講學心無逸憂民意不忘

陳經黃閣老問俗白髯郎不洩親毛穎知微却杜康青  
雲隨鶴駕紫綬列鸞行漢代規模大周官法制詳懿親  
思魯衛洪業重高光師古人爲鑑存心禮自防不知干  
乘貴惟恐一夫傷餓殍虞填壑流民閔陷羗冰縑贖賤  
穎玉粒飫饑腸但欲調黎庶寧辭罄積倉分曹具饘粥  
隨處集羸尪有喨羣聲沸相攜蹇步躑胥靡無橫天盜  
賊耻相攘恩出蠲租令歡騰施藥坊嬰孩頌穀養齒酪  
賜棺藏故老偏優禮先賢盡表章中興想劉葛佐運念

闕張擬植千尋栢還栽八百桑廟堂新邃宇劍履列長  
廊杜屋重輪奐花溪頓煒煌齊名圖至白接武配蘇黃  
善政俱修舉仁聲遠播揚校人馴狎虎膳宰縱河魴要  
使天心順寧教物命戕至誠通造化惠澤及飛翔淵懿  
真堪述謙恭莫肯當崇儒先五教建極重三綱開館延  
耆艾隆師錫篚筐衣冠儀秩秩絃誦韻洋洋執業諸生  
衆求書使者忙九流分插架萬卷載連檣樂善人心悅  
無爲國本強虛懷臻聖域騁步領文場揮翰銀鈎活擣

辭玉佩鏘鼎彝皆國器蘭桂本天香觀妙言逾富研精  
食靡遑日惟親孔孟性不惑姬姜軫念窮邊地垂情健  
卒糧撫身無凍餒遇敵必騰驤解語踈鸚鵡長鳴歎驪  
驪劬農興耒耜寬法絕桁楊當代真希遇前王或未嘗  
泰山高莫並瀛海浩難航麟趾耽經史龍衣佩瑤璜笑  
談溫玉色追琢燦金相肅挹尊賢傳端居喚小璫已能  
通魯語正可齒虞庠玉樹連枝秀瓊葩奕葉芳骨竒瞻  
日角派近識天潢舉措存寬厚蒐羅必俊良聚賢頻設

醴寶訓舊明堂末學逢昭代平生服令望承顏初見日  
屈指九經霜術類千金帚榮過七寶牀敢期蓮作炬每  
飲蔗爲漿身賤思疑病言高點類狂汗顏趨紫闥馳夢  
落滄浪心怯恩波闊人誇寵數彰賜衣頻跼躄前席屢  
磅徨投簡安能賦開筵特命觴偶同華屋燕徒飽大官  
羊雅句褒彌重微軀感莫量聯篇舒錦綺一字重琳琅  
憶昔憂居壘陳情訴陟岡奎文昭孝行宰木發光芒寵  
異兼存歿風聲別否臧望林掄杞梓占斗拔干將知已



恩偏渥希賢德甚涼何繇酬覆載深幸覲顛卬喜見皇  
家盛從知世運昌弓戈藏府庫道德固金湯政教依仁  
宅詢謀遠知囊朝廷存鎮重已棘敢飛揚誠可回天地  
心能協雨暘羣生蒙長養百穀屢豐穰人傑生臯摯邦  
基過夏商九重延祚胤百世愛禎祥磐石安宗社山河  
拱帝鄉孤忠深佇望恭已贊吾皇

人日從蜀王登萬歲山

鰲首高臨紫極開五雲長日擁蓬萊嵩呼曾獻君王壽

人日今從帝子來  
寶仗鳴鞭金騾裹石牀  
御坐錦莓苔  
才華愧匪朝陽鳳  
飛蓋華陰喜共陪

宿峰頂次濟定韻

層崖削壁跨千重  
坐鎮西南勢獨雄  
元氣崑侖磅礴外  
祥光隱見有無中  
珠璣寶藏留全相  
金碧樓臺倚半空  
縱是蓬萊并弱水  
清光難與此相同

登歸雲寺閣

棲身丹壑總忘歸  
水閣頻登趣不稀  
雨脚斜侵耕叟笠

苔花青匝定僧衣  
山餘積雪寒猶壯  
巖墮流星曉更飛  
卜築何當居此地  
玉堂金馬任相違

木皮嶺

自慚非佛亦非仙  
也宿丹崖綠樹巔  
曉汲衣翻草頭露  
午炊竈起木皮煙  
日離滄海三竿遠  
天厭烏紗五尺連  
頓覺眼前無俗物  
片雲飛過鳥爭喧

山中對景書懷

烏靴脫却換青鞋  
踏徧名山愜素懷  
虎嘯石頭風萬壑

鶴眠松頂月千厓雲開面面峰如削谷轉行行樹似排  
湖海故交零落盡烟霞清趣幾人偕

宿新津寶花寺

百丈岡頭佛寺開晚涼按轡陟崔嵬落花亂逐溪流瀉  
歸鳥低衝馬箭回雲外老僧鋤筍蕨樹根童子掃莓苔  
景清愛借禪房宿不爲叅玄聽講來

送吳主簿

關西短簿衆稱賢太華峯前坐五年心爲嫉邪曾奏事

家因好客不留錢，霜寒茅屋鷄聲蚤。  
月落江城鴈影翩，此去京華遇鄉使。  
好將嘉政萬人傳。

次韻贈方負巖山人

到處清泉可洗心，禪機一指用功深。  
任教東住復西住，不改鄉音與梵音。  
見客喜爲青眼顧，能詩懶效白頭吟。  
近來識面峨眉上，蘿月松雲得共尋。

次韻兄調弟希政并東鄭叔度二首

百年喬木陰當戶，五畝幽居水映茅。  
好古喜尋遺老問。

避喧懶與貴人交從兄受學慚蘇轍與弟分財笑薛包  
孝友傳家得無愧聚蚊免使退之嘲

鄉閭儒術許誰加弟唱兄酬興未賒經濟有心慚薄德  
安居無事任貧家日高甕牖蜂穿紙潮落江汀鴈聚沙  
却嘆離居趨侍日時來相對卜燈花

挽徐節婦

大節寥寥不可聞晚從吾郡始知真百年禮樂無男子  
一日干戈有婦人波冷曹娥沉白骨雨荒剡嶺洗紅塵

爭如烈焰三千丈高照青編萬古春

贈韓敏道先生赴召

先生樂道慕前人又被書徵覲紫宸詩卷已隨官棹月  
布衣還染屬車塵文章共喜遭逢晚禮樂應知入問頻  
登眺鳳臺多制作郵筒珍重寄河濱

次韻留別陳李明先生二首

太丘美政漢稱賢高節英風四海傳  
垂白雲孫今幾葉  
汗青甲子已千年  
盍簪重見星垂象  
落筆猶驚地湧泉

耻以文章爲世用，懶將辭色向人妍。

每懷海上三秋別，來借山中一榻眠。妙論久容親講席，深盃相勸惜離筵。時清共喜閑身健，情重翻令別意綿。他日朝廷訪遺老，吹噓擬進白雲篇。

絕句

枯木圖寄許士修

春到已多時，幽禽尚未知。上林無限好，何事立枯枝。

虎圖



踴躍谷生風崢嶸百獸中豈知王者瑞足不履生蟲

題山水二首

欲向匡廬隱出門知路難江山奇絕處多在畫圖看  
離家今幾載衣袂染京塵不敢看圖畫青山恐笑人

題曹娥江

娥以孝而死江因娥得名至今潮上落猶帶哭爺聲

題竹月圖送太學生歸省

黃金臺上月照爾憶親情歸去供甘旨春林笋正生

病中除夕四首

數漏掩殘歷中宵氣候殊獨憐愁共病不與歲同除  
三十知未老已難同少年功名謝時輩心事愧前賢  
里巷占新歲皆云勝舊年幾回新歲過萬事只如前  
良醫難治病學道不能行瘡疾何須患吾心病未輕

題畫

茅屋東嶼西嶼白雲前山後山爲報溪頭流水落花休  
出人問

牧牛圖

谷口驚湍雨歇柳陰芳草春還試問太平樂事夕陽牛  
背青山

奉試靈芝甘露論

漢家圖治策賢良董子昌言日月光自笑腐儒千載後  
却勞聖主試文章

書事

伏枕三旬不整冠夢魂時復對金鑿忽聞盛事披衣坐

今日朝廷立諫官

二月十四日書事二首

斧戾臨軒几硯閑  
春風和氣滿龍顏  
細聽天語揮毫久  
携得香煙兩袖還

風軟彤庭尚薄寒  
御爐香繞玉闌干  
黃門忽報文淵閣  
天子看書召講官

試院偶題三首

柳影波光鎖院深  
一塵不到市聲沉  
多情惟有雙靈鵲

時到庭前送好音

三代賓興法尚存每因取士嘆斯文  
近來眼病無聊甚  
豈復能空冀北羣

橋門冠蓋藹如雲才氣爭先總出羣  
自愧腐儒無一藝  
強顏來此較斯文

次韻謝蜀王六首

有序

敬蒙睿恩賜以篇什誦味感愧  
次韻六首以謝  
恩命許辭金殿直歸裝仍賜石渠書  
欲知懷德無窮意

長望星辰想屬車

志是子淵方是廣才如曾點始爲狂自慚未學何爲者  
孤負恩言髻欲蒼

幸瞻天下難逢德又讀人間未見書魂夢何嘗違禁闥  
深恩安敢忘巾車

德尊待士真忘勢位下憂民每悔狂明日岷峨應漸遠  
莫雲回首看青蒼

全德已看承道統雄才更復主詩盟欲知聖敬心無息

顧諟參前與倚衡

德勝東平弟與兄共誇樂國似蓬瀛  
近聞傳令安黎庶  
歡動山南十萬兵

侍世子奉獻蜀王十首有序

臣謬以疎庸獲侍世子殿下硯席竊覩岐嶷之  
姿英偉之識度越于人萬萬誠宗社之慶欲述  
鄙言陳民事人情物理之槩少效忠懇以廣聰  
明恨未果爲先作絕句十首以進伏惟益懋典

學以副下情不勝至願

賢君德業本天成猶待修心道益明喜見儲王親筆硯  
更須講學近儒臣

昧爽先求問寢衣三朝日日禮無遺古來世子能敦孝  
惟有文王最可師

祖訓昭昭日月新由來治國本天倫令名要使傳千載  
仁政須教及萬民

炫日輝霞錦價高製成稱體小龍袍試看黼黻文章美



須念蠶桑杼軸勞

金匙磔盤絳紗籠玉瑩珠圓顆顆同願采豳風歌七月  
要知稼穡重三農

農事艱難古所憐一生幾度過豐年若非聖世輕租稅  
逐末何人肯力田

九經治國本修身身正方能鑒別人辯佞要知駕異驥  
任賢莫指玉爲珉

君王待士古來無令德高名滿八區濟美喜看賢世子

已能端拱禮諸儒

去歲開倉賑饑夫今年下令活無辜東平謾說能爲善  
未識當時有此無

稅薄刑清見盛時民安田里俗熙熙欲求上古無爲治  
仁孝君王自足師

謝蜀王賜果十首

有序

屢承佳果之賜偶爾成句并述所見以寄下情  
謹錄進上伏惟宥察

涪州丹荔擅時稱翠筐來庭色尚新獻罷未曾登玉案  
先教頒賜與羣臣

翠籠擎出殿門東受賜羣臣喜色同却笑開元恩未廣  
祇將異味悅深宮

尚食頻供素膳回金壺僊醞不曾開君王嗜道渾忘味  
佳果何勞遠貢來

無才慚曳殿門裾珍味頻嘗玉饌餘解道側生風味好  
惜非梁苑馬相如

九重勤儉恤民勞錫貢深思道路遥異味奇珍俱詔罷  
皇明家法勝前朝

病身趨召歷千山又見江城荔子丹竊食無功心有愧  
賜歸分與衆人看

園官愛果勝黃金一樹生成一樹心味美已知堪適口  
當思培植用功深

利欲頽波挽不回幾人沉溺壞靈臺要明聖道無窮意  
須仗賢王不世才

道術衰微幾百年，陋儒無力愧皇天。  
已看位是真王貴，須使心承往聖賢。

新製蒲鞭賜理官，丁寧用法效劉寬。  
好生要使民無犯，示辱如寬也不難。

無題三首

宮臣傳教造安車，駕出金門賜舊儒。  
優老免親藩國政，入朝唯讀帝王書。

山南桃李競春光，食實年年在異鄉。  
應被旁人暗相笑

閑官那得許多忙

伯兄海上思相見  
幼子山南憶別離  
兩地關心歸未得  
夜看雲漢立多時

遠違闕庭二首

應闕思家兩繫情  
君王恩重屢留行  
欲知去國遲遲意  
三日祇趨一日程

形如槁木榮枯泯  
心似虛舟去住忘  
底事別情猶不奈  
只因懷德慕賢王

遊峨眉山紀行十首

一鶴相隨復一瓢  
山巔水滌足逍遙  
祇因戀闕情無限  
回首忘過萬里橋

西蜀雲山處處奇  
最奇人說在峨眉  
想應踏遍千崖月  
露滴松梢鶴夢時

出郭涼風入抱清  
亂山遮馬似相迎  
寧知待召登瀛客  
忽作看雲聽水行

王憐塵土辱凡肌  
命入雲山茹紫芝  
只恐同袍不相識

誤猜禮佛到峨眉

客久賢王兩賜衣不知春到已春歸  
清朝試出都門看留得殘紅一片飛

山頭月出天初露江面風生水欲波  
正是勝遊新得意片雲相引入岷峨

朝辭宮闕莫田家江白山清兩岸沙  
卧犬不驚籬落靜麥風簷底響縹車

孤舟湖口一名僧咫尺鄉山識未曾  
今去峨眉同覽勝



躋扳須上百千層

名山佳處孰同遊  
白髮緇衣四五流  
青眼古銘鄉士彥  
燈前夜夜話台州

學僂無骨佛無緣  
甘着儒冠坐一壇  
入社敢同陶靖節  
不須三笑虎溪前

入山後覽定水仰山二上人并吳講師次子發成  
都絕句韻因復次韻述事言懷

落日斜明掛樹瓢  
下方城郭去人遙  
青山過雨僧深定

門外雲封獨木橋

羽客禪僧也好竒對人覓句幾攢眉林端新月初高夜  
葉底殘紅落盡時

倚澗人家近更清吠風驚犬走還迎衲衣鶴氅從章甫  
落日看山一字行

山南夫子待多時庭外松花落磴芝夜半夢回聞鼓響  
覺來顙泚冷沾眉

澗底白頭僧浣衣雲間童子負薪歸幽栖更羨投林鳥

半已尋巢半已飛

千尋古木已無柯萬丈深淵不起波此日勝遊他日記  
落花時節到中峨

東海西頭是我家門前花徑接鷗沙三年別後

一作徒却

多恨敢道詩書讀五車

山行十日只逢僧盡道蒙恩報未曾共上峨眉望宮闕  
祥雲五色繞三層

奉詔名山作勝遊壯懷如水不停流今朝獨坐峨眉頂

一覽端能隘九州

榻借禪那豈夙緣坐來渾似舊家壇祇應心事慚蘇晉  
不解長齋繡佛前

次韻寫懷送叔貞之成都十七首

有序

乙亥新春出城東偶作十七詩同遊諸友從而  
和之因亦次韻以寫所懷會叔貞之成都書以  
識別詩中所云司戶孫者即叔貞也

道濟羣生心尚歎知周萬物禮逾勤能爲世上難行事

始是人中寡過人

盛世豈無謀國者漢家長憶富民侯榮名史策尋常事  
公論江河萬古流

漢高嫚士千餘載不見師臣與友臣解使時君謙德重  
孔明而下兩三人

下士立身涇渭渾胸中耿耿是非存子雲美新最可賤  
著作猶尊李仲元

密葉叢篁噪晚鴉荒村百里兩三家疲民采拾供租稅

猶恐傍人議權茶

多才久要錢文學長日詩筒袞袞來俊思雪消三峽長  
好懷春到百花開

伯尚庭前傾竹葉用中宅畔看梅花天教二子相爲樂  
來往風流也足誇

每懷樗散鄭司戶喜看杞梓作孫枝氣清似得江山助  
才異休令匠石疑

胡生挾策行千里足繭衣穿不肯回斯道要爲終古計

丈夫寧避俗人猜

江山萬里無黃耳  
雨露三年憶紫荆  
日暮出門聞鴈過  
忍聽雲畔索羣聲

一念無爲付道耕  
百邪還聽歛心兵  
本原能與天同體  
三代功名始可成

浩蕩乾坤爛漫春  
天將樂意付窮人  
迴無臭味堪誇世  
縱有爭心豈解嗔

烏石岡頭白苧衣  
幾回醉伴夕陽歸  
山中兄弟遙相憶

未必天心與我違

我與東風作主賓  
忍教負却太平春  
一觴一咏酬佳景  
也未輸他世上人

梅逕桃蹊遶葦門  
半依城市半通村  
春風一見如相識  
莫逆於心兩不言

魚在深淵鳥在山  
乾坤無物不相關  
野亭日午支頤坐  
閑看雲天一鶴還

食罷移床坐小亭  
細看羣蟻奪餘腥  
倦來莞爾成微笑



宇宙茫茫幾廢興

感舊九首

雄文不見林公輔  
病眼荒荒何處開  
將相亦輸天上樂  
多情莫向世間來

盃酒論心有幾人  
天台張穀舊相親  
近來詩句多奇語  
書比藏真更絕倫

精通八法揚文過  
暗誦五經陳用中  
揮翰天庭應獨步  
忍飢村巷欲成翁

翰苑暫歸盧太史銓曹已失鄭郎中名高金殿龍頭選  
夢憶蒼山馬鬣封

林鄭爲文學我家波瀾議論闊無涯兩年不見何時到  
望斷嶓江八月槎

博陵博士才華盛漢上畸人道術卑欲寄一書無鴈過  
相期千古只心知

立言溫粹懷陳采肆筆縱橫憶鮑岡若使韓門加接引  
未容籍湜獨升堂

王郎遠逐雲中戍許子俄爲地下郎重訪舊人尋舊迹  
嶺雲溪月總堪傷

多病深知志術荒中年若復厭文章欲圖天地相終始  
肯與時人較短長

別母舅哭外舅鄭公三首

昔奉安車共入關擬於此路復南還今朝獨向江東去  
淚洒西風草樹斑

女甥携抱遠相從骨肉情深反負公南鄭江頭三尺塚

夕陽衰草萬山中

竹帛相期古道深  
結婚端不爲多金  
自慚非是竒男子  
恐負侯高擇婿心

中秋對月二首

雙槽鳴江水不波  
雲山無數拂船過  
夜深把酒問明月  
月色與愁誰較多

南鄭荒墳草木寒  
東甌舊宅桂花丹  
九秋最好今宵月  
又向孤舟獨自看

題漢中三寺佛放光

三寺神燈古有名我來惟見月華清  
非關佛日今消歇應避文星不敢明

蜀相像

羽扇綸巾一卧龍誓言匡寶祚  
剪奸雄圖開八陣神機外國定三分掌握中

買臣妻墓

青草池邊一故丘千年埋骨不埋羞  
丁寧囑付人間婦

自古糟糠合到頭

二喬觀書

深閨睡起讀兵書  
窈窕丰姿若个誰  
千古周南風化本  
晚涼何不誦關雎

王節婦

兩月孤兒百里墳  
一燈風雨幾黃昏  
可憐玉帳豪華客  
不識金沙節義門

鄭義門

丹詔旌門已拜嘉  
千年盛典實堪誇  
史臣何用春秋筆  
天子親書孝義家

彭山道中

煙鳥歸林已夕陽  
野人相引度高岡  
馬頭一片青山影  
經過絺衣似水涼

夜度桑洲驛

山路彎彎石甃平  
碧天涼露下三更  
無端一夜西風惡  
吹着新愁上紫荆

客至

竹裏烹茶費屢呼，携壺沽酒遠村無。  
同食麥飯無難色，風槩知非淺丈夫。

聞盧原質表兄廷試探花郎授編修喜而寄之  
奉天殿上榜初開共賀江南得秀才，好是青蘿居士說  
近來文運屬天台。

送義烏龔叔安給事歸省

鷄舌同含侍紫宸，朝回東閣每相親。  
片帆忽逐西風去。



鴛鴦行中少一人

繡湖煙雨正宜秋之子還家喜得遊  
忠孝堂前舊明月  
相隨重到鳳池頭

談詩五首

舉世皆宗李杜詩不知李杜更宗誰  
能探風雅無窮意  
始是乾坤絕妙詞

前宋文章配兩周盛時詩律亦無儔  
今人未識崑崙派  
却笑黃河是濁流

發揮道德乃成文枝葉何曾離本根未俗競工繁縟體  
千秋精意與誰論

大厯諸公製作新力排舊習祖唐人粗豪未脫風沙氣  
難詆熙豐作後塵

萬古乾坤此道存前無端緒後無垠手操北斗調元氣  
散作桑麻雨露恩

覽陳先生見和諸詩戲題

孔璋揮翰檄曹公烈日秋霜格力雄白髮雲孫千載後

新詩尚可愈頭風

道者扇

競利爭名不暫休  
紛紛盡逐水東流  
道人心事如松栢  
閱盡尋常草木秋

題山水隱者

先生六歲時作

棟宇參差逼翠微  
路通猶恐世人知  
等閑識得東風面  
卧看白雲初起時

題山水

霜落江南木葉丹  
滔天波浪一舟還  
何人得似林中叟  
目送浮雲過遠山

修德惠枯木圖次韻四首

有序

修德先生寄惠枯木小幅  
并以詩留別病中不能追從  
謹次韻奉答

遠別出門愁見難  
燕山越水路盤盤  
將心付與天邊月  
兩地清宵一樣看

月明樹影落晴波  
寫寄山房古意多  
已分此身同槁木

歲寒相對老巖阿

百年禮樂愧前賢  
濂洛微言久不傳  
待子歸來同講習  
細炊麥飯飲寒泉

至道無間昧力行  
神交千載獨周程  
直教俯仰渾無愧  
始是堂堂世上英

見梅

寒梅凍後放幽姿  
何事今年花較遲  
昨日途中春意到  
溪頭纔見兩三枝

畫梅

微雪初消月半池  
籬邊遙見兩三枝  
清香傳得天心在  
未許尋常草木知

竹

不禁俗物敗人意  
忽見幽篁眼爲明  
記得舊遊天上夢  
連昌宮外聽秋聲

題東坡畫竹

內翰何年寫畫圖  
眼中驚見鳳毛孤  
一枝潤帶江南雨

遂使眉山草木枯

斑竹圖

湘君泣盡淚痕乾  
翠袖蕭蕭倚暮寒  
却憶洞庭爲客處  
滿湖風月泛舟看

墨菊二首

解印歸來鬢已斑  
故園松菊可怡顏  
祇緣三徑荒涼久  
特寫秋花仔細看

分根昔日向東籬  
種近羲之洗硯池  
幾度偶澆池上水

花開朵朵墨淋漓

題菊

順流舟楫日邊回  
古木軒窗水際開  
萬里西風數行鴈  
送將秋色過江來

馬

一日曾騎越與燕  
鼓車隨後意茫然  
圉人何必相羈絆  
亦未乘龍去上天

聞燕



曉夢驚回燕語巢窻前紅日在花梢心思佩玉朝天日  
待漏金門鼓尚敲

百雀圖

曲巷高簷避網羅朝來飽啄隴頭禾但令四海長豐稔  
不厭人間鼠雀多

羲之籠鵝圖

內史清真江海情每將高誼動朝廷平生却被能書誤  
更爲鵝羣寫道經

荷花渚禽

絕世丰姿不受塵  
丹霞爲質玉爲神  
渚禽莫怪開時晚  
一洗尋常草木春

鸚鵡

幽禽兀自嚙佳音  
玉立雕籠萬里心  
只爲從前解言語  
半生不得在山林

立春偶題二首

萬事悠悠白髮生  
強顏閱盡靜中聲  
效忠無計歸無路

深媿淵明與孔明

百念蹉跎總未成  
世途深恐誤平生  
中宵擁被依牆坐  
默數隣鷄報五更



遜志齋集卷二十四